

## هامینی بئزر، اؤزو ایسه لوت گزر

حسن خدایی

کارشناس ارشد شیمی

سون ایلرده ۲- خرداد جریانی ایله مشهور اولموش و هامییا تانیش اولان بیر یئنی دوشونجه اورتایا چیخمیشدیر. بو دوشونجه اؤز یئنی لیگی و جذبہ سیله بیر چوخ دوشونن بیین لری اؤزونه دوغرو چکمیش و اؤز قوللوغونا قاتا بیلیمشدی. همیشه اولدوغو کیمی تاریخده دؤنه - دؤنه تکرارلاشان بئله بیر یئنی لیکلر، یئنه ده اؤز فیکری و یدی قوه لرینین بؤیوک بیر قیسمینی یازیق، باشسیز، کیم لیگینی ایتیرمیش، اؤزلوگونو تانیمامیش آذربایجان تورک لریندن توپلایا بیلیمشدیر. بوجریانین باشیندا دوران بؤیوک تئورسین لر، فیکیر وئرن و خط گوسترن لرین بیر چوخو اصلاً تورک اولموشلار. مختلف ۲- خرداد اورقان لاریندا، گونده لیکلرینده چالیشان، دولغون مقاله لر یازان و کتابلار قلمه آلان لارین چوخو، بو یازیق آذربایجانلی لاردان اولوشدوغو حالدا، بو حرکتین اجرایی یولوندا چالیشان لار و اونون جارچیسسی و تبلیغاتچی سسی اولانلار و بویولدا بوغازلارینی بیرتیب، دریدن - قابیقدان چیخانلارلا یئنه یازیق، اؤزلوک سوز، کیملیک سیزو اؤکسوز ( یتیم ) آذربایجانلی لاردان تشکیل تاپمیشدیر. منجه بو، هئچ بیر تعجب دوغوران مسئله دئییلدیر. بلکه بیزیم میلیمیزین احوال - روحیه سیله تانیش اولانلار و تاریخیمیزده دؤنه - دؤنه بئله حاللارین تکرارینی گؤره نلر بومسئله یه ده چوخ طبیعی باخایلرلر. تاریخ بویو اولکه میزده مختلف مفکوره لرین یارانماسینا شاهد اولموشوق. سول، ساغ، اورتا و . . . خط لرده ایره لی له یین جریانلار سون یوز ایلیکده اولکه میزده اورتایا چیخمیشدیر. همین خط لری یاخیندان مطالعه ائندنه باخیرسان کی، بویئنه دوشونجه لر، بیرینجی دؤنه آذربایجانلی لارین بییننده جانلانمیش، فورمالاشمیش و اؤزونو بروزه وئرمیشدیر. بلکه ده ائله دوز دئمیش لرکی، آذربایجان ایرانین باشی و بیینی ساییلایلر. تورک آذربایجانلی نین بیینی همیشه حق و حقیقت آختاریشیندا اولموشدور. آنامیز آذربایجان زامان سورہ سینده مختلف ساحه لرده بؤیوک و انسانلار یئتیشدیرمیش، داهی لر بئجرمیش اولکه میزه و دونیا یا تقدیم ائتمیشدیر. نظامی لر، فضولی لر، نباتی لر، ناتوانلار، آخوندزاده لر، رسولزاده لر، صابیرلر، محمدقولوزاده لر، خیابانی لر، ستارخانلار، باقیر خانلار، علی میسیولار، پشه وری لر، بهرنگی لر و . . . کیمی بؤیوک داهی لر میلیمیزی سعادتہ دوغرو آپاران بو فیکیر جارچیلاری زامان - زامان ائله بو تورپاقدا یئتیشمیش لر. آذربایجان دونیا یاشادیقجا بو بؤیوک داهی لرینه اؤیونه جک و فخر ائده جکدیر. آنجاق ائله بو آذربایجاندا باشقا اولادلاردا توره میشلر. اؤزلوک لرینی ایتیرمیش میلت لرینی دانمیش و یالانچی آریا کیملیگی قابیغینا گیرمیش، هویت سیز کیمسه لرده،

ائله بو آذربایجاندا باش قالدیرمیشلار. آدلارینی چکمک ایستمه دیگیم، بو آدام لار، تاریخ بویو بیرجه اؤز لرینی، اؤز اصالت و هویت لرینی، اؤز وارلیق لارینی دوشونمه میش، آنلامامیش و دویمامیشلار. بورادا آتا بابالاریمیزین بیرجه سؤزونو خاطرلایتماق ایسته دیم. تاریخینی، کیملیگینی، وارلیغینی، اؤزلوگونو و دیلینی تانیمایان و تانیتمایان و یاشاتمایان بیر میلّت اؤزونه میلّت آدینی وئرهبیلمز و گله جگینه صاحب چیخاییلمز. بو میلّت ازیلیب، اودولوب و محو اولاجاقدیر. بو میلّت اؤز بوشلوق لارینی دولدورماق اوچون باشقالارینا یؤنه له جک و اونلارین تاریخینی، وارلیغینی و دیلینی و . . . منیمسه یه جک دیر. بو کیمی آدام لارهرنه یی باشقالاریندا آختاراجاق و نهایت باشقاسینا قوللوق ائتمکدن، باشقاسینی دیرچه لتمکدن ساوایی هئچ نه الله ائده بیلمه جکلر. چوخ تأسف کی بیزیم بئله آدام لاریمیز دا چوخدور. بیر زامان سولچو، بیر زامان ساغچی، بیر زامان نه بیلم نه چی و ایندی ایسه ۲- خرداد چی اولان آغالار، نه زامان آنلایاجاق، نه زامان دوشونه جک و نه زامان اویانا جاقلار. گوره سن کئچمیشده کی سولچولاریمیز، پهلویچی لریمیز، آریاچیلاریمیز و نه، نه و . . . نه چی لریمیز اونلارا اؤرنک دئیل می؟ گوره سن اونلار اؤز عالم لرینده آذربایجانین سعادتینه و خیرینه خدمت ائتمکدن و اساسدا و گرچکده یابانچی لرا قوللوق و نوکرچیلیک ائتمکدن، بو یازیق یوردا و اونون میلّتینه نه ائده بیلمیشدیر؟ گوره سن ۲- خرداد تاپیتتی سی اؤز جذبّه لی دموکراتیا شعارلاریله آذربایجانا و آذربایجانلی یا ایندییه جک نه ائتمیشدیر و نه ائتمک ایسته میشدیر؟ اوزومو ۲- خرداد جارچیلارینا و اؤزه للیکله بو مفکوره نی تبلیغ ائدن، اونون نقص لرینی اؤرت - باسدیر ائدن و ( قوت نقطه لرینی ) قاباردان یازیق آذربایجان ضیالی و آیدین لارینا توتوب، دئییرم : نه ( ایکی خرداد )، نه ده سیزین وعده له دیگینیز ( مدنی جامعه )، بوتون دموکراتیا سیله بیر لیکده آذربایجانا و اونون تورک انسانینا خدمت ائتمک اوچون یارانمیشدیر. بو مفکوره ده تورک سوز و آذربایجان سیز بیر ( بؤیوک ایران ) دوشونولمکده دیر. بونو آچیق - آیدین گؤرمک مومکوندور. شووئنیسم تۆکونتو لرینین ائه بو جریاندا حساس و تعیین ائدیجی مؤوقع لرده چالیشماسی، اوزدن ایراق مدنی جامعه نیزین سایه سینده هله ده آذربایجانین و آذربایجانلی نین اؤز دوغما و قانونی حق لرینه چاتا بیلمه مه سی سئچکین لیگین هله ده داوام ائتمه سی، سؤزلریمه مؤحکم بیر ثبوت دور.

عزیز دوستلاریم و یولداشلاریم:

من هئچ ده یئنی چیلیگه قارشى اولمامیشام، بلکه آچیق کؤنولله اونو قارشى لامیشام. آنجاق هر بیر یئنی لیگه، یئنی تاپیتتی یا و اؤز لیلیگه یئنی دوشونجه و حرکتّه چوخ احتیاطلا یاناشماق لازیمیدیر. منجه بعضی تعریف لر هله بیزده یئرینه اوتورمادان، بویئنی لیک لر بیزلری بدبخت لیگه دوغور گؤتوره جکلر، هر بیر آذربایجانلی، هر بیر تورک اؤنجه، اؤزونو

تانیمالی، کیم اولدوغونو، تاریخینی و دیلینی مکمل بیلمه‌لی و دونیانی و اوندا اولان هر بیر یئنی تاپیتینی یالنیز و یالنیز آذربایجان پنجره‌سیندن و آذربایجان آچی سیندان و چرچیوه‌سیندن گۆرمه‌لی، اینجه‌له‌مه‌لی و یاناشمالی دیر. یوخسا مکرر گۆروندوگو کیمی بو یئنی تاپیتتی لارین ایره‌لی آپارانی آذربایجان تورکو اولدوغو حالدا آذربایجانا هئچ نه عایید اولمایا جاقدیر. ایگنه‌کیمی هامینی بئزه‌یه جگیک، آنجاق نهایت اؤزوموزلوت گزجه‌بیک و باشیمیز پاپاقسیز قالاجاقدیر